

RAIX

CANTA

**SERGIO
BRUNI**

SI LL'AMMORE E'
'O CCUNTRARIO
D'A MORTE



01. NAPULE DOCEAMARA

Versi di Salvatore Palomba / Musica di Sergio Bruni

No, nun l'hanno 'nventato 'e puate,
chistu golfo lucente sta cca,
e 'a bellezza te leva 'o respiro
e te mette na voglia 'e pregà.
Ma cca pure sta 'o mmale e 'o dolore,
na miseria ca se po' tuccà,
dint' 'o nniro d' 'e vicule nire
addò "nun se po' manco sciatà".

Napule doceamara,
Napule doceamara,
si Dio t'ha dato 'o mare
forse te può salvà.
Cu ll'anema scuieta,
chienna d'arraggia e ammore,
pe na speranza 'e bene
io te voglio cantà.

No, nun l'hanno 'nventata 'e ggjurnale
chesta storia d' 'a "malacità",
ogni ghiuorno me pare ca overo
cchiù difficile 'a vita se fa.
Ma, chi 'o ssape pe quale mistero,
nu calore int' all'aria ce sta
e int' 'a gente n'ammore p' 'a vita
ca t'aiuta nu poco a campà.

02

CARMELA

Versi di Salvatore Palomba / Musica di Sergio Bruni

Stu vico niro nun fernesce maie
e pure 'o sole passa e se ne fuie
ma tu staie lla, tu rosa, preta, e stella :
Carmela, Carmè.

E chiagne sulo si nisciuno vede
e strille sulo si nisciuno sente
ma nun è acqua 'o sanghe dint' 'e vvene,
Carmela, Carmè.

Si ll'ammore è 'o ccuntrario d'a morte
e tu 'o ssaie,
si dimane è sultanto speranza,
e tu 'o ssaie...

Nun me può fa' aspettà fino a dimane:
astrigneme 'int' 'e braccia pe stasera,
Carmela, Carmè.

03. AMARO È 'O BENE

Versi di Salvatore Palomba / Musica di Sergio Bruni

Nu suono 'e fisarmonica se sente
ma nun 'o ssaccio si m' 'o sto sunnanno
o forse sta sunanno overamente.
Nu suono 'e fisamormonica se sente...

Amaro è 'o bene,
amare songo 'e vase ca me daie.
Nun tene cielo,
st'ammore nuosto nun tene dimane.
Amaro è 'o core
pecchè nun sape chello c'ha da fa'
si ha da tremmà pe te o s'ha da fermà.
Amaro è 'o bene...
amaro è 'o bene...

Ce sta int'all'aria nu presentimento,
chi sa si chesta è già ll'ultima vota,
sento ca me l'arrobbo ogni mumento.
Ce sta int'all'aria nu presentimento...





04

CHE LLE CONTO ?

Versi di Salvatore Palomba / Musica di Sergio Bruni

E n'ata vota sotto a chistu cielo
tutto nzieme, accussi, more n'ammore.
E tu me dice : " nun è colpa mia ",
e tu me dice : cerca 'e me capi ",
ma io nun saccio capi.

Che lle conto a st' uocchie mieie
pe lle di ca già dimane
nun te ponno cchiù guardà?
Comme spiego a chesti mmane
ca sta faccia accussi bella
nun 'a ponno accarezzà?
Che lle conto a chistu core?
Dico - nun 'a vulé bene ?
Chesto nun ce 'o pozzo di,
ca si pure me faie male
chillo nun me sta a senti.

E n'ata vota sotto a chistu cielo
more 'o munno pe chi perde n'ammore.
E tu me dice : " fatte na ragione,
forse era scritto c'avev 'a ferni ",
e io chiagno e dico si ..



05. 'A FATA D' 'E SUONNE

Versi di Giuseppe Marotta /
Musica di Sergio Bruni

Sì, t' 'o scrivo stu bigliettino.
Sì, t' 'a faccio sta serenata.
Ma, cu 'a penna o cu 'o mandolino,
che te dico? Stamme a sentí...

Maria, Mari,
st'ucchie lucente e sta vucchella rossa,
primma ca tu nascive,
Napule s' 'e ccantava.
Stu nomme tuoio, Marí, s' 'o cunnuliava
na connola 'e mare,
doce doce.
Tu si' 'a fata d' 'e suonne,
che aspettavano a te.

Si te voglio nu sacco 'e bene
Si me sento dint'a stu core
nu profumo ca va e ca vene,
si te guardo senza parlà.

06. 'NA BRUNA

Versi di Aniello Langella /
Musica di Sergio Bruni e Augusto Visco

Venette da tanto lontano
nu furastiero, nu furastiero ...
Restaie 'ncantato d'o mare,
d'o sole e 'a luna
nu furastiero..
Se 'ncantaje 'e dduie uocchie curvine
'e na bruna 'e vinte anne d'età.

Chella vo' bene a n'ato
e pe chillo more,
pe chillo more...
Pe nu bellu guaglione
'e piscatore ,
'e piscatore.
Furastiero 'e denare che so' ?
Quanno 'o core fa chello ca vo'
Chella s'è fatta 'a croce cu l'acqua 'e mare,
cu l'acqua 'e mare
E po' ha giurato io nun te lasso maie,
nun te lasso maie.

P' 'o mare na festa 'e lampare...
Nu piscatore, nu piscatore
S' astregne int' 'e braccia na bruna
cu 'o velo 'e sposa, cu 'o velo 'e sposa.
Dice 'a gente: cu bona furtuna,
pe cient' anne, pe sempe accusi .

07. CHE MIRACOLO STAMMATINA

Versi di Salvatore Palomba / Musica di Sergio bruni

Che miracolo stammatina,
io ,cu ll'uocchie d'a meraviglia,
veco 'o munno p' 'a primma vota,
comme fosse nu piccerillo,
che miracolo stammatina.
Veco 'a rondine dint' 'o nido,
veco ll'onna ca va e ca vene,
sento 'o viento che sbatte e canta,
proprio comme fa 'o core mio.
Che miracolo stammatina.

L'anema mia,
st'anema mia,
ha miso vela,
ha miso scelle
e d' 'o cielo 'e chistu mumento
tutt' 'o mmale lontano sta.

Che miracolo stammatina,
sento 'o sole ncopp' a na mano
e accarezzo soprappensiero
chianu chiano ll'acqua d'o mare,
che miracolo stammatina.
Faccio parte pur'io d'o munno,
comme ll'albero e comme 'a fronna,
comme 'a nuvola e comme ll'aria,
comme 'a preta che sta int' 'o sciummo.
Che miracolo stammatina.

08

NAPULE E' MILLE FERITE

Versi di Salvatore Palomba / Musica di Sergio Bruni

E' già l'alba, torna 'o sole,
schiera iuorno n'ata vota.
dint' e ccase senza mure
trase 'o cielo, chianu chiano.
Trase 'o cielo chianu chiano
ma nun trase mpiett' a me.
Tengo 'o core ca è na preta,
nun me fido d'o purtà,
eppure io canto pe turnà a campà:

Napule è mille ferite
e chisà comme sta vota
se putaranno sanà.

E' spuntata 'na frunnella
mmiez' a strata scarrupata,
na frunnella ca già tremma
dint' e mmane 'e na criatura.
Dint' e mmane 'e na criatura
ma nun tremma mpiett' a me.
Tengo 'o core ca è na preta,
nun me fido d'o purtà,
eppure io canto pe turnà a campà:

Napule è mille ferite
e chisà comme sta vota
se putaranno sanà.

Dint' e ccase senza mure
trase 'o cielo chianu chiano
ma nun trase mpiett' a me...

09. BELLA, SI TU VENISSE INT' A STI BRACCIA

Versi di Salvatore Palomba /
Musica di Sergio Bruni

Bella , si tu venisse int' a sti braccia,
pe na siconda vota io nascesse,
comme nu picceriello addeventasse
e p'ogni cosa 'e niente io redesse.

Spuntasse 'o sole e io m'addennucchiassse,
schiarsse 'a luna e d'oro io me sentesse,
'o cielo mai cchiù niro me paresse,
'o mmale mai cchiù male me facesse,
si tu venisse dint' a sti braccia.

Bella si tu venisse int' a sti braccia
pe ll'ore sane io t'accarezzasse
ma forse 'o core mio nun ce 'a facesse
e p'a troppa priezza se fermasse...



RAIZ

CANTA

**SERGIO
BRUNI**

SI LL'AMMORE E'
'O CCUNTRARIO
D'A MORTE



PALCOSCENICO

Versi di Enzo Bonagura /
Musica di Bonagura e Sergio Bruni

Signo' acalate ca dimane nun ce vengo! ...
Va p' 'o vico na voce, na stesa
p' 'e mmaeste ca vonno fa' 'a spesa.
Vva p' 'o vico na voce, na stesap' 'e mmaeste
ca vonno fa' 'a spesa
na carretta ch'è chiena 'e campagna
ll'accumpagna pe tutt' 'a città
ll'accumpagna pe tutt' 'a città.

Mo na sciassa cu' o rrusso e cu' o ggiallo
s'appresenta cu' a museca e 'o ballo
pazzariello è chist' ommo ch' avanza
votta e scanza, cchiù folla se fa.

Puo' di' ca 'e strade 'e Napule chesto so'
nu palcuscenico,
puo' di' c' 'a gente 'e Napule chesto vò
nu palcuscenico.
So' scene comiche
so' scene tragiche
mentre se recita
siente 'e cantà:
"Napule, Napule, Napule, Na' ...
Acqua fresca... chi s' 'a veve".

'Mpont' 'o vico s'apara na festa
passa 'o ruoto, 'o varrile, 'a canesta
comme arriva na chiorma 'e straniere
che se vede?
Currite, curri!
Che se vede?
Currite, curri!

Carulina se scippa cu Rosa
chell'è nzista, ma chest'è gelosa
pe nu guappo ca 'nganna dduie core
sti ddoie sore so' bbone 'e muri.

Puo' di'
ca 'e strade 'e Napule chesto so'
nu palcuscenico,
puo' di'
c' 'a gente 'e Napule chesto vò
nu palcuscenico.
So' scene comiche
so' scene tragiche
mentre se recita
siente 'e cantà:
"Napule, Napule, Napule, Na' ...
'E mellune chine 'e fuoco..."

Signò acalate, ca dimane nun ce vengo! ...

10

RAIZ CANTA SERGIO BRUNI

Ho sempre cantato Sergio Bruni, o meglio lui ha sempre cantato dentro di me. La sua musica ha attraversato la mia infanzia, accompagnando gioie e dolori della mia famiglia; le sue canzoni appartengono alla collettività dei napoletani. Il mio tributo dunque va oltre quello dovuto all'immenso artista: questo album è un omaggio al mondo che mi ha generato e donato tutti i mezzi espressivi.

Ho registrato questi brani con un rispetto quasi religioso, un ringraziamento alla mia città attraverso l'opera di uno dei suoi artisti più rappresentativi. E' stato un viaggio non sempre facile, poiché le emozioni che queste composizioni evocano sono forti: il solo indugiare su alcune note mi ha riportato al tempo della mia fanciullezza e possibilmente ancora più indietro, fino a toccare il cuore delle generazioni che mi hanno preceduto. Oggi mi sento più completo e in pace, come chi compie un dovere a lungo disatteso. Grazie dunque a Sergio Bruni e grazie a Napoli: madre, amante, dea.

Questo album è dedicato alla memoria di mia madre Anna Esposito, senza la quale non avrei saputo cantare neanche una parola, e alla vita di mia figlia Lea, alla quale spero di saper trasmettere l'amore per questa musica.

Gennaro Della Volpe in arte Raiz.

**SI LL'AMMORE E'
'O CCUNTRARIO
D'A MORTE**



RADICANTO:

Giuseppe De Trizio

chitarra classica, arrangiamenti

Adolfo La Volpe

chitarra portoghese, chitarra classica

Giovanni Chiapparino

fisarmonica

Francesco De Palma

Cajon set, riq, darbuka, udu, caxixi.

E CON:


Giorgio Vendola

contrabbasso

Elisabetta Serio

pianoforte in "A fata d'e suonne".





Prodotto da:
Gennaro Della Volpe e Giuseppe De Trizio.
Registrato, editato, mixato e masterizzato da
Luigi Patruno presso gli studi Crescendo
di Bari tra febbraio e aprile 2022.

Un ringraziamento speciale va al M.o Salvatore
Palomba, che con i suoi preziosi suggerimenti
ha guidato i miei passi nella stesura di questo
lavoro ed a mia moglie Daniela, ascoltatrice di
sogni e mitigatrice di voli troppo pindarici.

Photographer:
Riccardo Piccirillo

Graphic Designer:
Francesco "Paura" Curci

RAIZ CANTA **SERGIO BRUNI**
SI LL'AMMORE E' 'O CCUNTRARIO D' 'A MORTE

01. NAPULE DOCEAMARA

(Bruni - Palomba)

02. CARMELA

(Bruni - Palomba)

03. AMARO È 'O BENE

(Bruni - Palomba)

04. CHE LLE CONTO?

(Bruni - Palomba)

05. 'A FATA D''E SUONNE

(Bruni - Marotta)

06. 'NA BRUNA

(Bruni, Visco - Barrucci - Langella)

07. CHE MIRACOLO STAMMATINA

(Bruni - Palomba)

08. NAPULE È MILLE FERITE

(Bruni - Palomba)

09. BELLA SI TU VENISSE IND''A STI BRACCIA

(Bruni - Palomba)

10. PALCOSCENICO

(Bruni - Bonagura)